

Evening Dogri News Bulletin, 01 May 2024

इवनिंग डोगरी न्यूज़ बुलेटिन

समे-18:15 Hrs

Headlines

- 1 जम्मू-कश्मीर च आतंकवादिएं गी तुप्पी फगइने लेई जारी तुपाई कार्रवाई दा दायरा जिले कठुआ तगर बधाई दिता गेआ ऐ।
- 2 अनंतनाग राजौरी लोकसभा सीट लेई मतदान हून 25 मई गी करवाया जाग। पीडीपी ते नेशनल कांफ्रेंस नै चुनां अगड़े पाने पर विरोध जाहर कीता ऐ।
- 3 दक्खनी गुजरात दे उद्योग ते बपार मंडल दा इक शिष्टमंडल उपराज्यपाल मनोज सिंहा होरें गी मिलेया।
- 4 दऊं दिनें तोड़ी बंद रौहने दे बाद जम्मू-श्रीनगर राष्ट्रीय जरनैली सड़क लौहकिएं गइडिएं दी आओजाई लेई खोली गई। एतिहासिक मुगल रोड अज्ज उप्परोतली 6में रोज बी बंद ऐ।

<><><><><><>

Kathua-CASO

सुरक्षा एजेंसिएं उधमपुर ते कठुआ जिले च तपाशी अभियान गी व्यापक बनाई दिता ऐ। एह तपाशी अभियान उधमपुर जिले च विलेज डिफेंस गार्ड दी हत्या च शामिल 2 आतंकवादी गुट दी तपाश लेई ऐ। आकाशवाणी जम्मू संवाददाता दी रिपोर्ट मुजब ग्राम रक्षा गार्ड पनाश ग्रां च आतंकवादिएं कन्नै होए दे इक लौहके जनेह टाकरे च शहीद होई गेआ हा। पुलस, सेना ते सी.आर.पी.एफ आस्सेआ सांझे तौर पर तपाशी अभियान चलाया गेआ। तपाशी अभियान दा अज्ज चौथा दिन ऐ। एह तपाशी अभियान बसंतगढ़, बनी ते उधमपुर दे सियोज इलाके ते कठुआ च चलाया जा रदा ऐ तां जे आतंकवादिएं गी फगड़ेआ जाई सकें पर अजें तगर फरार आतंकवादिएं दा पता नेई लग्गा ऐ। पुलस थवां थहोई दी जानकारी मुजब आतंकवादिएं दा इक गुट उधमपुर जिले दिएं उच्चियें धारें पर ते दुआ कठुआ जिले दे बनी, डगार ते किंडली इलाके आली भेठा उठी गेआ ऐ। सुरक्षा बलें उधमपुर ते कठुआ बश्कार आले जंगली इलाके च तपाशी अभियान चलाया ऐ। ड्रोन दी मदद बी लैती जा रदी ऐ। इनें इलाकें च बाददू नफरी गी बी तैनात कीता गेआ ऐ। शुरूआती जांच मुजब आतंकवादिएं दे 2 गुटें च 4 थवां 6 आतंकवादी होई सकदे न। सुरक्षा बल आतंकवादिएं गी फगइने लेई हर संभव कोशश करा रदे न। इयां मन्नेआ जा रदा ऐ जे एह आतंकवादी कठुआ जिले थवां बसंतगढ़ पुज्जे।

<><><><><><>

ECI

भारती चुनां आयोग नै जम्मू-कश्मीर दी अनंतनाग-राजौरी संसदी सीट लेई त्रीये गेइ तैहत होने आले चुनां दी तरीक गी नमें सिरेया तय कीता ऐ। इस सीट लेई मतदान हून 7 मई दे बजाय 25 मई गी होग। आयोग मुजब प्रदेश दिएं बक्ख-बक्ख सियासी पार्टिएं पास्सेआ कीती गेदी गुजारशें दे मद्देनजर एह फैसला लैता गेआ ऐ। एहदे शा पैहले आयोग नै आखेआ हा जे बक्ख-बक्ख सियासी पार्टिएं उनेंगी गुजारश कीती ही जे खराब मौसम ते शिड़कें दी माड़ी हालत दे चलदे उनेंगी इस सीट लेई प्रचार च बड़ी दिक्कतें दा सामना करना पवै करदा हा। उआं दऊं बड्डी सियासी पार्टिएं नेशनल कांफ्रेंस ते पीडीपी नै इस फैसले दा बरोध कीता हा। पीडीपी दे कार्यकर्ताएं अपने सीनियर नेता नईम अख्तर हुंदी अगुवाई च चुनां आयोग दे इस फैसले खिलाफ बरोध प्रदर्शन कीता। पीडीपी नै मंग कीती जे जम्मू-कश्मीर प्रशासन दी ओकड़ी रिपोर्ट जेहदी बिनाह पर अनंतनाग सीट लेई चुनां गी अगड़ा पाया गेआ ऐ, उसी सार्वजनिक कीता जा। नेशनल कांफ्रेंस दे प्रधान डॉक्टर फारुक अब्दुल्ला होरें बी अनंतनाग-राजौरी सीट लेई चुनां अगड़े

पाइयै 25 मई गी करोआने दे चुनां आयोग दे फैसले दी नुक्ताचीनी कीती ऐ। उनें आखेआ जे उनेंगी इस हल्के दे लोकें दा पूरा समर्थन हासिल ऐ।

<><><><><><>

Lt. Gov. Chamber

दक्खनी गुजरात दे उद्योग ते बपार मंडल दे प्रधान रमेश नत्थालाल वघासिया होंरें मंडल दे होरनें औहदेदारें दे कन्ने अज्ज राजभवन च लेफ्टिनेंट गवर्नर मनोज सिन्हा हुंदे नै मलाटी कीती। बैठक दरान केंद्र शासित प्रदेश जम्मू-कश्मीर च उद्योग ते बपार खेतर गी बढ़ावा देने सरबंधी केई पैहलकदमिं पर चर्चा कीती गई। एल.जी होंरें उनेंगी अपने प्रशासन दी तरफा हर मुमकन मदाद दा यकीन दोआया ते आखेआ जे निवेशकें गी जम्मू-कश्मीर च रास-पूंजी लाने गितै साजगार म्हौल उपलब्ध करोआया जाग। जम्मू-कश्मीर दे उद्योग ते बपार मैहकमे दे कमिशनर सैक्रेटरी विक्रमजीत सिंह होर बी इस मौके पर उत्थे मजूद है।

<><><><><><>

UGC-NET

इस बरे होने आले यू.जी.सी नेट दे मतेहान दी तरीक गी अगड़ा पाई दिता गेआ ऐ। हुन एह मतेयान 16 जून दे बजाय 18 जून गी लैते जाडन। यू.जी.सी नै एह फैसला मेदवारें थवां थहोई दी प्रतिक्रिया दी पच्छौकडै च लैता गेआ ऐ। यू.जी.सी नै आखेआ ऐ जे एह मतेयान पूरे मुख्य च इक्के ध्याड़े ओ.एम.आर मोड च लैता जाग। यू.जी.सी-नेट दा मतेयान भारतीय यूनिवर्सिटीज़ ते कॉलेज च असिस्टेंट प्रोफेसर ते जूनियर रिसर्च फेलोशिप लेई लैता जंदा ऐ।

<><><><><><>

IIMC -Course

भारती जनसंचार संस्था आई.आई.एम.सी नै औंदे शैक्षणिक बरे सोयां 2 नमें एम.ए प्रोग्राम शुरू कीते न। संस्थान नै मीडिया बिजनस स्टडीज़ स्ट्रैटर्जिक कम्युनिकेशन च एम.ए गी शैक्षणिक सत्र 2024-25 सोयां 2 बरे दे पाठ्यक्रम दे तौर पर शुरू करने दी घोषणा कीती ऐ। एह संस्थान दे नर्मी दिल्ली परिसर च पढ़ाय जाग ते एहदे च 40 सीटां उपलब्ध होग।

<><><><><><>

Highway

जम्मू-श्रीनगर राश्ट्री जरनैली शिड़क पिच्छले 2 दिन बंद रौहने मगरा अज्ज लौहकी गड्डिं दी आओजाई लेई खोली दिती गई ऐ। एह शिड़क रामबन च केई सारी थाहरें ल्हास-पस्सियां पौने करी बंद होई गई ही। आकाशवाणी जम्मू संवाददाता दी रिपोर्ट मुजब बड्डी गड्डिं गी अजें इस शिड़क पर चलने दी इजाजत नेई होग। लौहकी ते हौली गड्डिं गी दौनें भेठा दा राश्ट्री जरनैली शिड़क पर चलने दी इजाजत ऐ। शिड़क दे खुल्ली जाने पर सैकड़ां बद्दे लोकें गी राहत थहोई ऐ। ऐतिहासिक मुगल शिड़क लगातार 6-में रोज बी गड्डिं दी आओजाई लेई बंद ऐ।

<><><><><><>

Road-Reasi

यात्रिं दी सुरक्षा गी यकीनी बनाने दे मकसद कन्ने शिड़क ते यातायात मैहकमे आस्सेआ सारी कारोबारी गड्डिं दी फिटनेस जांच लेई मुहिम चलाई गई। इस दौरान चीजां बस्ता ढोने आली गड्डिं दी बी जांच कीती गई। इस बारे जानकारी दिंदे होई शिड़क ते ट्रांसपोर्ट मैहकमे दे इंस्पेक्टर तूषार अंथाल होंरें आखेआ जे इस मुहिम दा मकसद गड्डिं दी फिटनेस यकीनी करना ऐ। इस दौरान 40 गड्डिं दी जांच कीती ऐ। उनें आखेआ।

<><><><><><>

CS-JKAACL

जम्मू-कश्मीर की कला, संस्कृति ते भाषाएं सरबन्धी अकैडमी आस्सेआ राईटर्स क्लब जम्मू दे के.एल सहगल हाल च मन्ने-परमन्ने दे कवि अमर शहीद सखानंद कोल प्रेमी होरें गी श्रद्धांजलि देने लेई 34में बलिदान दिवस दा आयोजन कीता गेआ। मुख्ख सचिव अटल डुल्लु होर कार्यक्रम दे मुख्ख परौहने हे। अपने संबोधन च मुख्ख सचिव होरें प्रेम जी हुंदी विरासत गी सम्मान देने दे महत्वै पर लो पाई ते आखेआ जे ईयां करियै अस असल मायने च उंदी दस्सी दी बता पर टुरी सकने आं। उनें खिते दी समृद्ध सांस्कृतिक विरासत दी सांभ-संभाल ते इसी बढ़ावा देने च कलाकारें ते कविएं दे जोगदान गी पंछानने ते एहदा जश्न मनाने दे महत्वै पर बी लो पाई। कार्यक्रम दरान केई बड्डी शखिसयतें बी अपने विचार सांझे कीते।

<><><><><><>

Labour Day

वेयर हाउस नेहरू मार्किट जम्मू की ट्रेडर्स फेडरेशन आस्सेआ अज्ज पैहली मई गी मजदूर दिवस दे सरबन्धी च इक कार्यक्रम दा सरिस्ता कीता गेआ। साबका डिप्टी मेयर बलदेव सिंह बलोरिया होरें इस कार्यक्रम च हिस्सा लैता ते सबबनें गी इस ध्याड़े दिआं ममारखां दितियां। उनें आखेआ जे मजूर बड़े चुनौतीपूर्ण हालात च कम्म करदे न ते ओह हर इक राष्ट्र की रीढ़ की हड्डी होंदे न। फेडरेशन दे प्रधान दीपक गुप्ता होरें इस मौके पर मजदूर दिवस दे महत्व ते इतिहास पर लोs पाई ते आखेआ जे फेडरेशन म्हेशां गै मजूरें-श्रमिकें दिएं समस्याएं गी हल करने लेई वचनबद्ध रौहग।

<><><><><><>

JKDMA-Warning

जम्मू-कश्मीर आपदा प्रबंधन प्राधिकरण नै मध्य कश्मीर दे गांदरबल जिले दिएं उच्चिएं धारें पर अगले 24 घंटे दौरान बर्फू दे ल्हास-तौदे पौने की चेतावनी जारी कीती ऐ। जारी इतलाह मुजब अगले 24 घंटे दौरान गांदरबल जिले च मध्यम दर्जे दे ल्हास-तौदे पौने की चेतावनी जारी कीती गई ऐ। इस इलाके च रौहने आले लोकें गी हिदायत कीती गई ऐ जे ओह ल्हास तौदे पौने की शंका आली थाहरें पर नेई जान। प्रशासन नै इनें थाहरें दे आले दोआले रौहने आले लोकें गी आखेआ ऐ जे ओह कुसै बी आपात स्थिति च 112 नंबर पर डायल करी सकदे न।

<><><><><><>

LPG-Price

तेल कंपनियें फौरी प्रभाव कन्नै कारोबारी रसोई गैस आले सिलेंडर की कीमत च 19 रपे प्रति सिलेंडर की कटौती कीती ऐ। इंडियन ऑयल की वेवसाइट मुजब मूल्य च संशोधन मगरा 19 किलोग्राम दे बिजन सब्सिडी आले कर्मिश्यल एलपीजी सिलेंडर की खुदरा बिक्री कीमत दिल्ली च इक जहार 745 रपे 50 पैसे ऐ। कोलकाता च इक जहार 859 रपे, मुम्बई च 1 जहार 698 रपे ते चेन्नई च 1 जहार 911 रपे होग। हालांकि घरेलू इस्तेमाल आले एलपीजी की मौजूदा कीमत पैहले आली गै होग।

<><><><><><>

Navy-Vice Admiral

वाईस एडमिरल कृष्णा स्वामीनाथन होरें अज्ज नौसेना दे उप-प्रमुख दा औहदा सांभी लैता ऐ। कार्यभार सांभने परेंत उनें नमीं दिल्ली च राष्ट्री युद्ध स्मारक पर देसै की सेवा च सर्वोच्च बलिदान देने आले जांबाजें गी श्रद्धांजलि अर्पित कीती। ओह जुलाई 1987 च भारती नौसेना च नियुक्त कीते गे हे ते ओह संचार ते इलैक्ट्रानिक जंग दे माहिर बी हैन।

<><><><><><>